


Dr. A.R. Lampe



F: Kico a inspira bo pa bira un Pastoor?

Dr: Ora mi a risibi prome Santa Comunion mi mester a haya les apart di Bijbel pa motibo cu mi tabata bay un scol publico. Eynan mi admiracion a cuminsa pa e bida di Hesus, e storianan a fascina mi con e tabata yuda cu milager hende den necesidad. Despues ora mi tabata na Colegio Arubano mi a lesa di e bida di sacerdotenan na America Latina cu tabata yuda hendenan pover. Mi kier a pone mi bida tambe na sirbishi di esnan den necesidad y mi a bisa mi mes, si nan por mi tambe por y mi a mira e ora ey ser sacerdote como un bunita profesion.

F: Bo ta un revolucionario?

Dr: No, mi ta un seguidor di Hesus di Nazaret, kende su pensamento ta implica un revolucion den mentalidad di hende. Hesus tabata un reformador. Reformador tabata esun cu kier mehora su mundo social y religioso. Hesus a nace den hudaismo y kier a mehora e sistema, por ehemplo Hesus a radicaliza e amor pa prohimo y a pone hasta cu bo tin cu stima bo enemigo. Pero Hesus tabata un revolucionario tambe. Un revolucionario ta bin cu algo totalmente nobo y ta cambia e reglanan di e wega social y religioso. Hesus a predica e Reino di Dios cu ta un cambio global di structuranan na favor di amor y justicia. Mi role model ta Hesus, pesey semper mi ta na favor di cambio, pero no den e sentido violento of rebelde.

F: Bo a uza bo posicion como Pastoor pa haya forza politico?

Dr: Nunca. Si mi a haci esey awe mi partido lo mester tin hopi mas asiento den Parlamento, ya cu e gran mayoria di e poblacion di Aruba ta catolico. Semper mi tabata masha cauteloso pa no usa Dios pa mi interesnan politico. Ta e otro politiconan bo ta tende ta usa nomber di Dios sin mester. Tur dia mi ta reza pa Dios usa mi pa e idealnan di su Reino, no pa ami usa Dios.

F: Ta parce cu bo tin un rencor personal contra specialmente ex Minister Tico Croes. Esaki ta cuadra pa un persona cu tabata un lider Christian?

Dr: No ta berdad. Mi tin aprecio pa su persona como academico. Mi a hasta boga ser-

ca sr. Frido Croes y sra. Lydia Emerencia pa Tico Croes keda incorpora den e cuerpo academico di Universidad di Aruba. Lamentablemente esey te awe no a tuma lugar. E tempo ey mi a haci denuncia contra e Minister di Finanzas involucra den e caso di bouwfraude (Fondo Desaroyo Nobo San Nicolas) y no ta importa ken e ta, e por tabata mi famia of amigo, mi tin cu para pa berdad.

F: Pakico ta difcil pa conforma na expectativa di Parlamento pa loka ta vestuario?

Dr: Mi ta bistiendo correctamente. Guayabera blanco den nos region tin mesun status cu bachi cu dashi segun reglanan di protocol. Mi no ta violando ningun ley, pasobra Reglement van Orde di Parlamento (e presidente y e vice-presidente di Parlamento e tempo ey tabata na Surinam pa celebracion di 25 aña di independencia di Surinam) pa autoriza nos pa drenta den sala di Parlamento y autoridad policial a bay di acuerdo cu e proposicion aki. Mesora cu e hendenan a drenta parlamento, e tension riba caya a baha, esey polis mes ta reconoce. Si no tabata pa mi intervencion, lo tabata tin dramamento di sanger pa terkedad di ex-prome minister cu tabata nenga di bin risibi un manifiesto.

F: Tempo di e proyecto Race track, Bo tabata na cabez di protestanan fuerte. Kico bo ta pensa di e plannan nobo pa Seroe Colorado, unda un solo proyecto hotelero lo haya tur e beachnan publico?

Dr: E plannan aki ta contra interes di e pueblo di Aruba, mas bien e ta na favor di un especulador di tereno. Lo mi keda boga pa e beachnan no conoce limitacion pa publico en general, cu e sea un area residencial pa nos mesun hendenan local cu por ofrece facilidatnan chikito pa huur na turistanan y cu e area di mina di Guamo sea declara patrimonio historico y area di naturaleza proteha.

F: Kico bo ta pensa awe ainda riba e hecho cu bo a keda aresta despues di e protestanan contra entre otro race track y privatisacion di Setar?

Dr: Mi a biba esey como parti di mi compromiso como seguidor di Hesus. Ta poco cristiannan tin e privilegio di keda aresta pa causa di e ideal di justicia. Imita Hesus te den e hecho di keda aresta, ta un gracia. Ya cu Hesus tambe a keda aresta, algo cu nos ta recorda tur Diabierna Santo. Mi a biba e experiencia ey como algo positivo den mi bida cristian. Pesey nunca mi a sinti rencor ni mi a bib'e como algo negativo. E tabata un experiencia inolvidabel e anochi ey den cel di KIA, ora cu e prisioneronan a

keda pasa di cel pa cel un Bijbel te cu e a yega den mi man.

F: Bo a sostene e violencia y destruccion publico, incluso na Parlamento e tempo ey?

Dr: No, mi rol tabata di ta pacificador. Den e caso cu a sigui den Corte unda cu mi persona a keda acusa di a comete 'opruiging', e comisario di polis a declara cu danki na mi intervencion paz a bin bek riba caya. Mi no a guia e manifestacion, ta ora cos a sali fo'i man, un polis a pidimi pa mi haci algo, ya cu e a tende via radio di polis cu nan a busca shotgun. Mi a pensa cu e unico manera pa trece tranquilidad bek ta di saca e hendenan for di riba caya e anochi scur ey, pesey mi a propone na e acting president di Parlamento (e presidente y e vice-presidente di Parlamento e tempo ey tabata na Surinam pa celebracion di 25 aña di independencia di Surinam) pa autoriza nos pa drenta den sala di Parlamento y autoridad policial a bay di acuerdo cu e proposicion aki. Mesora cu e hendenan a drenta parlamento, e tension riba caya a baha, esey polis mes ta reconoce. Si no tabata pa mi intervencion, lo tabata tin dramamento di sanger pa terkedad di ex-prome minister cu tabata nenga di bin risibi un manifiesto.

F: Bo a drenta politica pa bringa Stempel Parlament. Bo lucha ta efectivo?

Dr: Esey no ta un cambio cu bo ta logra di un dia pa otro. E ta un cambio a largo plazo. Mi ta sembrando e semia dor di mi proposicion pa politiconan bay den parlamento y nombra expertonan profesional como minister. Den nos sistema di Aruba bo ta vota pa un parlamentario, den sistema di RED esnan cu risibi voto ta keda den parlamento y e poder di e votonan cu bo tin ta dunabo e poder pa controla un minister.

F: Bo a vota pa e LTU nobo. Kico tabata e motivacion y lo bo haci'e atrobe?

Dr: Uno, RED a core campaña cu e "Swiss model" pa limita e crecemento demografico y asina proteha nos medio ambiente. Dos, mi ta contra e triste realidad di un cantidad halto di matrimonio ficticio. E LTU nobo tabata responde na e dos argumentonan aki. Lamentable-

mente gobierno tabata contradictorio den su maneho. E mes a duna cantidad di permiso di construcion di miles di camber di hotel of condominios cu ta exige importacion di miles di trahador di afo. Y dor cu e gobierno no ta duna practicamente mas facilidad pa haya un paspoort hulandes, e unico manera pa haye ta dor di casa cu un arubiano, ke men e LTU nobo bao di e condicion aki ta fomenta mas matrimonio ficticio. Na e momento aki mi lo boga pa cambia bek e LTU, pasobra e no ta pas cu e maneho di gobierno y ta creando hopi problema.

F: Hopi biaha ta tende cu Arubiano no ta gusta traha y ta mucho pasivo. Kico ta bo opinion?

Dr: Esey no ta berdad, e arubiano no ta gusta haci 'cheap labor'.

F: Ki Gobierno bo ta mira na 2009?

Dr: E lo ta un gobierno di coalicion.

F: Red lo por ta den un coalicion cu MEP of cu AVP?

Dr: Si, RED ta habri pa traha cu cualke partido con tal esey ta e deseo di pueblo expresa den e preferencia di voto.

F: Kico ta e tres cosnan mas importante cu bo lo cambia si bo ta den Gobierno?

Dr: Reforma drastico di AZV, terapia obligatorio pa adictonan ambulante, guia educativo di traimeria pa tur mucha y hoben.

F: Con lo bo percura pa mehora calidad di bida na Aruba?

Dr: Nos meta ta pa Aruba integra den Union Europeo, unda e exigencia di calidad di bida ta halto.

F: Politica ta e unico rumbo pa bo? Lo bo por bolbe como Sacerdote?

Dr: Politica ta e unico rumbo pa bo? Lo bo por bolbe como Sacerdote? Politica no ta e unico rumbo pa mi. Mi ta gusta hopi tambe e trabao academico, banda di mi trabao sacerdotal. Obispo a bisami bon cla cu si mi bolbe funciona como sacerdote lo mi tin cu bay traha leu for di Aruba, ya cu aki mi ta un persona controversial. Te na e momentonan aki esaki ta e situacion: sali for di politica pa mi ta nifica sali for di Aruba. ■